

Jems

Jems mij ñu kil tikak

1 ¹Yad Jems. God, Bi Kib Jisas Kraiss, kirop apil mal wög gi ñibin. Nibep bin bi Jisas Kraiss minim tep ne ak niñ dil, ju am karip lim ke tigoñ tigoñ midebim okok, mij nibaul ñu kil tikil, “Ñibi midebim?” agebin.

Miker tari tari apenigab, nibi gos par ma niñnimib

²Ai mam sikop. Miker tari tari onigab, gos par ma niñnimib; miñ miñ gilig gi nep midenimib. ³Ñibi nipim, miker apek koslam midenigabim ak, nibi Jisas Kraiss nop cig tep ginigabim. Nib ak, kisen miker tari tari nibep apenigab, nibi ma pirikil, Jisas Kraiss nop niñ di kilis gil, nop cig tep ginimib. ⁴Koslam midil, Jisas Kraiss nop cig tep gilig gi nep midil, gi damil me, nibi bin bi kilis, bin bi tep, bin bi asiñ ma mideb, midenigabim. ⁵Pen nibi bin bi ognap, cin tari tari gon tep amnigab, agnigabim ak, God bi cinop di tep yib gip ak nop ag niñem, ne nibep gos tep yipid gil ak ñinigab. God nop ag niñenigabim ak, yip tari ginig nib ag niñebim, agil, ma agnigab. ⁶Pen God nop ag niñnig, gos ar nokim nep niñil ag niñnimib. Pen cinop niñnigab aka ma niñnigab, agil, gos omal niñil ma ag niñnimib. Nibi gos omal niñil ag niñnigabim ak, yigen apil ñig solwara pagil di okdañ okil gip rek ak ginigabim. ⁷⁻⁸Bin bi nib okok rek, gos alap alap niñlig gi gel amib ak me, Bi Kib nop ag niñnigal ak, tap alap kirop ma ñinigab.

Bin bi tap ma mideb okok; bin bi tap koñai mideb okok

⁹Kraiss bin bi ai mam yim gep rek okok, God udin yirik ne ak, yad yib mideb, yad ñi pai ne midebin, agil, miñ miñ ginigab; ¹⁰pen ai mam tap koñai mideb okok, God udin yirik ne ak, yad ai mam tap ma mideb okok rek adip adip midebin, agil, miñ miñ ginigab. Tari ginig: tap tep ne ak mab sim rek kasek kir ginigab. ¹¹Pib lim gek, mab sim tep tep nibak pib kal niñil milep gil lulu gi yowip. Bin bi tap koñai mideb okok, wög kiri gi

dam amel niŋlig gi, kirop akniḅ rek nep ginigab. Kiri akniḅ rek nep kir ginigal.

Bin bi miker apek God nop ma kirig gipal

¹²Pen bin bi miker apek God nop ma kirig gil, cig tep gilig gi nep midenigal okok, usajil bad per per midep ak dinigabin, agil, miñ miñ ginigal. Bin bi God nop midmagil lipal okok, God kirop usajil bad per per midep ak tol gi ñinigab. Ne minim kilis agil niḅ agak.

¹³Bin bi, gi timel gin, agil gos niñenigal ak, God gos ñek nig gin, ag gos niñobin, ma agnimel mer. God ne ke, tap si tap timel ginim, ag gos ma niñnigab rek, bin bi ognap kirop gos nibak rek ma ñinigab. ¹⁴Pen gos timel kiri ke nīpal ar ak, kirop lip gi dad amek, tap si tap timel gin, agil gos niñnigal. ¹⁵Gos niñnigal nibak, tap yiñ rek yimel, tanil kidil am kilis ginigab rek ak, tap si tap timel ginigal. Pen tap si tap timel ginigal nibak, pis nep mid kilis gek, kimnigal.

¹⁶Pen ai mam tep yad okok. Minim tom agenimel ak, ma niñnimib. ¹⁷Tap tep tari tari yipid gil dipin okok, ke okok niḅ apek ma dipin. Bapi ne piḅ, takin, gap melik ñibal okok gi lak ne nep, cinop ar alaḅ niḅ ñib. Ne nag ar alap gi damil, tap kaunan rek adik gil, nag ar alap ke ma ginigab. ¹⁸Gos ne ke niñil gek, cin minim niñid ne ak niñ dil, komiñ kisen niḅ dil, ñi pai ne ke lil, tap magil ned niḅ miñ miñ gilig gi pag dopal rek midobin.

God Minim ak niñ tep gil, ageb rek nep ginimib

¹⁹Ai mam tep yad okok niñim! Bin bi nibep minim agenimel ak, kasek niñil; pen minim kasek ma agnimib; bin bi okok kirop kasek milik kal ma niñnimib. ²⁰Bin bi milik kal niñnigal ak, God ne, kiri gi tep gil mid tep gilaḅ, agil gos niñip rek ma ginigal. ²¹Niḅ ak, nibi gos timel niñil tap si tap timel gipim ak, tari ginig nig gipin, agil, tap gac gip nibak pis nep kirig gil, God midmagil nab nibep adaḅ minim ne yimib ak, di tep ginimib. Minim nibak nibep di komiñ yokniḅab.

²²God Minim nibak timid ak nep peyig niñil, bir nipin, agil ma agnimib. Nig genigabim ak, nibi ke minim esek agniḅabim. Nibi God Minim niñil, ageb rek genigabim me, bir nipin, agniḅabim. ²³Pen bin bi God Minim niñil, ageb rek ma gipal okok, añañ milik dai li nīpal rek gipal. ²⁴Añañ li niñil, milik dai kiri tari rek mideb, agil, niñ tep gipal ak pen kirig gil amil, kasek nep saköl gil, titi gi rek midosip, agil, ma nīpal. ²⁵Pen bin bi an an God Minim tep bin bi di komiñ yokeb minim tep ak niñ tep gil, saköl ma gil, niñlig gi nep gel amniḅab bin bi okok, God kirop kod midek, tari tari ginigal ak am yimeb ginigab. Bin bi niḅ okok kiri God Minim tep ak niñ tep gil, ageb rek nep gi midebal.

²⁶Pen bin bi, God nop wög gi tep gin, agil, aleb kiri ke niñ tep ma ginigal okok, kiri sidol gil, kirop ke minim esek apal. Kiri wög tari

gipal ak, magilsek tap yokop rek lip. ²⁷Ñi pai an an, nonim nap kimbal amoñilik koslam midebal okok abe, bin kanjil yim gep rek okok abe, kirop di tep ginimib. Pen bin bi lim dai ar wagin aul gos timel nipal okok eip mogim gil, asiñ kiri nibak ma ulik ginimib. Nig genigabim, God ne niñil, nibi bin bi asiñ ma mideb yad, wög gi tep yib gipim, agnigab.

Bin bi okok bin bi tep, bin bi okok bin bi timel, agil ma agnimib

2 ¹Ai mam sikop. Nibi Bi Kib cin Jisas Kraiss, Bi tep yib aknib ke nop niñ dipim rek, bin bi okok niñil, nonim ke ke lil, bi ak bi kib, bi ak bi tam okok, agil ma agnimib. ²⁻⁴Nibi God nop sobok ginig ap mogim ginigabim. Pen bi tap koñai mideb bi alap, walij tep tep lil, riñ gol ñin gol ne lil apenigab ak, nibi bi nibak niñil agnigabim, “Nak am mab bog ar tep tep okok bisigan,” agnigabim. Pen bi yim gep rek alap, walij timel lil apenigab ak, nibi bi nibak niñil agnigabim, “Nak gol okok warik midei,” aka “Nak lim tob wagin yad siñaul bisig midei,” agnigabim. Pen nig genigabim ak, yipid gil ma ginigab. Nibi ke gos timel niñil, ne bi kib, ne bi tam okok, agil, nig ginigabim.

⁵Pen ai mam tep yad okok niñim! Bin bi lim dai ar wagin ar aul, bin bi yim gep rek ognap niñil, bin bi siñak kiri bin bi tam okok, agölögipal. Pen God ne bin bi yim gep rek okok kirop nig ma gip. God ne kirop di tep gil, gos tep ñek, kiri God nop niñ dil cig tep gil, kaun kiri nab adañ bin bi gep yib ne okok midel niñlig gi, ne per per nep Kiñ kiri midenigab. Ne minim kilis niñid agil, bin bi yip midmagil lipal okok kirop nig ginigain, agak. ⁶⁻⁷Kiri pen bin bi yim gep rek okok kirop agnigabim, “Nak gol okok warik midei,” aka “Nak lim tob wagin yad siñaul bisig midei,” agenigabim ak, ne nabiñ gek niñlig gi bisignigab. Bin bi tap koñai mideb okok nep, Bi Kib tep nibep dip ak nop ag juil, nibep ag sikol gil, dam minim kib apal.

⁸Pen God Minim ak ñu kil tikil aglak, “Nak ke midmagil lipan rek, bin bi ke nib okok kirop ak rek nep midmagil linimin,” aglak. God lo minim kib yib agak ak rek genigabim ak, nibi gi rep yib ginigabim. ⁹Pen walij tap okok tol gipal rek niñil, bin bi nonim linigabim ak, God lo minim nibak tib juil, tap si tap timel ginigabim.

¹⁰Tari ginig: God lo minim ne okok magilsek niñ damil, pen lo minim nokim alap nep tib juenigabim ak, God lo minim magilsek tib junigabim rek linigab. ¹¹God ne lo minim agil, “Bin si bi si ma ginimib,” agil, “Cip ma ñag paknimib,” agil, agak. Nib ak, nibi bin si bi si ma ginigabim pen cip ñag paknigabim ak, nibi God lo minim ak tib junigabim.

¹²Nib ak, minim agniñ aka tari tari ginig, gos ar alap niñil agnimib, “God Minim bin bi di komiñ yokip minim tep nibak nep niñil, cinop minim kib agnigab,” agil gos ak niñnimib. ¹³Bin bi, bin bi ognap okok yimig ma niñnigal okok, God kirop minim kib agil, kirop ak rek nep

yimig ma niɲnigab. Pen bin bi, bin bi okok yimig niɲnigal okok, God kirop ak rek nep yimig niɲil, minim kib ma agnigab.

Minim nep ma agnimib; God minim ageb rek ginimib

¹⁴Ai mam sikop. Bin bi ognap, God nop niɲ dipin, apal ak pen God ageb rek ma gipal. Minim nep agil, God ageb rek ma ginigal ak, God kirop pen di komiɲ ma yoknigab.

¹⁵⁻¹⁶Ai mam ognap waliɲ ma midek, tap magil ma midek ginimiɲ okok niɲil, pen waliɲ tap magil ognap dam ñilig gi mer, yokop, “Amil mid tep ginimib,” agnigabim ak, gi tep ma ginigabim. ¹⁷Nib ak, nibi God nop niɲ dinigabim pen God Minim ageb rek ma ginigabim ak, niɲ dep magil nibi ak tap yokop rek linigab.

¹⁸Nibi ognap agnigabim, “Bin bi ognap God nop niɲ dipal; pen bin bi ognap God Minim ageb rek gil, bin bi okok gi tep gipal. Nib ak, minim ma mideb,” agnigabim. Pen minim agnigabim nibak, nibep pen ag niɲnigain, “Bin bi God nop niɲid nep niɲ denigal ak, kiri titi gil bin bi okok kirop gi tep ma ginigal? Yad God nop niɲ dipin ak me, ne ageb rek niɲ tep gil, bin bi okok kirop gi ñibin,” agnigain. ¹⁹Nibi God nokim nep mideb, agil, gos nipim ak gi tep gipim. Pen kijeki okok ak rek nep, gos ar nibak nep niɲil, pirikil jep jep dipal. ²⁰Nibi bin bi saköl rek! Nibi, “God nop niɲ dipin,” apim ak pen ne ageb rek ma gipim. Niɲ gipim ak, God nop niɲ dipin, apim ak tap yokop rek lip. Minim agebin nibaul bir nipim aka yad minim ognap sek nibep agen niɲnimib?

²¹Nibi nipim, based cin Ebrahim ñi ne Aisak nop God nop pak sobok gi ñinig gek, God niɲil Ebrahim ne bi tep agak. ²²Nib ak, Ebrahim God nop niɲ dak ak me, God nop bi tep ma agak; Ebrahim ne God nop niɲ dak ak abe, God agak rek nep gak ak abe, God tap nib omal niɲil agak, Ebrahim ne bi tep, agak. ²³Ñin ned nibak me, God Minim dai alap ñu kil tikil kiri bir niɲlak, minim ñu kil tiklak nibak, minim niɲid ñu kil tiklak: “Ebrahim God minim ne niɲ dak ak me, God Ebrahim ne bi komiɲ tep yad agak.” Ebrahim gak nibak, God Ebrahim nop, bi niɲep yad, agak. ²⁴Nib ak nibi nipim, nibi God nop niɲ dinigabim ak nep, God nibep, bin bi komiɲ tep yad, ma agnigab. Nibi God nop niɲ dil, ne agip rek ginigabim ak me, God nibep bin bi komiɲ tep yad, agnigab.

²⁵Nib ak rek nep, bin Rehap gak. Ne bi si dep bin midoliɲip ak pen bi Isrel omal kariɲ lim ne ak kapkap lisim niɲniɲ aperek, Rehap kirop mal kariɲ ne ak kasin gi di we gil, kisen kanib ke nib par alap ag yokek, kiri pirik gi amil, kariɲ kiri adik gi amnirek. Rehap gak rek niɲil, God Rehap nop bin komiɲ tep agak. ²⁶Pen bin bi miɲ goɲ nep midil, kaun sek ma midebal ak, kiri komiɲ midep won ak ma mideb. Nib ak rek, bin bi God nop niɲ dipin apal ak pen God Minim ageb ar ak ma gipal okok, kiri ak rek nep komiɲ midep won ak ma mideb.

Aleb cin niņ tep gin

3 ¹Ai mam tep yad. Nibi koņai nep minim ag ñeb bi midojin, agil, ma niņnimib. Tari ginig: cin minim ag ñeb bi okok, minim kib kilis rek niņnigabin. ²Cin magilsek yipid gil ma gip ar ak ke ke koņai nep gipin. Pen bin bi aleb kiri kod mid tep gil, minim yipid gil ginigab ar ak nep agenigal okok, mib goņ kiri magilsek niņ tep ginimel rek linigab. ³Kaj hos ak kaj kib yib ak pen tap ain sikol alap nag ak sek ñon gil, di meg migan ak lil, amnig gebal pis ken lip gel ambal. ⁴Ñig magöb kib okok ak rek nep, yigen apil tap kib nibak dam yokop okok ambkop ak pen bi kapten okok stia sikol ak dil, amnig gebal pis ken di yipid gil gesal amib. ⁵Aleb cin ak rek nep tap sikol yib ak pen minim agon koņai nep lip. Nibi nipim, be kib yib nab ak, sikol milep bad alap sip ñel, yin damil magilsek yinnimiņ rek lip. ⁶Aleb mab milaņ rek mideb. Mib goņ dai cin ak timel nibak rek alap sek ma mideb; aleb ak nep gek, mib goņ cin magilsek acir ginigab. Aleb ak nep gek, ameb owep cinop ak magilsek gi timel ginigab. Pen mab milaņ nibak, karip lim Hel ak nib apil me, aleb ak nig gip.

⁷Kimin yakir, soiņ sarau, tap be okok mideb okok abe, tap ñig solwara okok mideb okok abe, damil mikel, gos niņil, nap kiri agnigal rek ginigal. Kiri kimin yakir tap okok damil mikil nig gipal ak pen ⁸aleb cin ak agon, gos niņ dinimiņ rek ma lip. Aleb per per tap si tap timel tari ginim, agil gos niņil, ñig silek bin bi ñag pak lep ak ap ran jakil mideb. ⁹Aleb cin ak, Bi Kib Bapi cin ak yib ne agon ar amnigab, pen bin bi God ne ke rek gi lak okok, tap timel apil kirop paknimiņ, agnigabin. ¹⁰Nig gil, aleb nokim nibak nep, minim tep abe agil, minim timel abe agil, gipin. Ai mam sikop. Tari ginig nig gipin? Ak tep ma gip. ¹¹Ñig kilam nokim alap juil, ñig tep ognap, ñig timel ognap ma owip. ¹²Ai mam sikop. Mab ak, nag magil ma pilnigab; nag ak, mab magil ma pilnigab. Pen dek kajoņ ak, ñig komiņ tep ma linigab.

Milik yapek, asik ke ke ma linimib

¹³Nibi gos niņ tep gipim aka? Gos niņ tep gipin, agnigan ak, nak niņ tep gil, yib nak ke agek ar ma amnimiņ. God nop tep ginimiņ ar ak nep ginimin. Nak nig genigan ak me, gos niņ tep gipin, agil, agnigan. ¹⁴Pen gos nab nak eyaņ, tap tep kiri okok yad ke dinim, ag gos niņnigan ak, aka yad nep bi kib midenim, ag gos niņnigan ak, yad gos niņ tep gipin, agil, ma agnimin. Nib agnigan ak, minim tom agnigan; minim niņid ak kariknigan. ¹⁵Bin bi gos niņ tep gipin apal ak pen tap timel nibak rek gipal okok, God gos tep ñib ar ak ma nipal; bin bi karip lim ar wagin aul nipal rek nep nipal. Gos kiri ak God Kaun ne ma ñib; Seten ne nep ñib. ¹⁶Pen bin bi, tap tep okok yad ke dinim, ag gos niņnigal okok, aka yad nep bi kib midenim, ag gos niņnigal okok, kiri per per pen pen gilig gi, tap si tap timel ar ak nep gel amnigab.

¹⁷Pen bin bi God gos tep ñib rek nipal okok, midmagil nab kirop adañ tap si tap timel acir nibak rek ma mideb. Bin bi kausal maual rek midebal okok eip minim agil, nibi jim ñil mid tep ginimib, apal. Kiri bin bi okok kirop ag pasak dil, di tep gipal. Kiri bin bi okok midmagil yib lil, yimig niñil, di tep gil, kirop tep ar ak nep gipal. Kiri bi tep ak eip agnigain, bi timel ak eip ma agnigain, agil, gos ar ak nib ma nipal. Minim esek ma apal. ¹⁸Bin bi kausal maual rek midebal okok eip minim agil, nibi jim ñil mid tep ginimib, agel, kiri minim nibak niñil jim ñil midenigal ak, tap yij yimbal nibak tanil tap tep pilnigab.

God nop cig tep ginimib

4 ¹Per per milik yapek pen pen gipim ak, gos timel nab nibi adañ pen pen gil, mib goñ nibi di lip ginig geb ak me, nig gipim. ²Tap tep dinig nipim okok ma dil, kal yib juil, bin bi ñag pak lin, agil, gipim. Tap tep okok ma dinimib rek lek, pen pen agil, pen pen gin agil nipim. God nop ag nipkep, dipkep. Pen nop ma ag nipim. ³Pen God nop ag nipim ñin ak, gos niñ tep gil ma ag nipim. Cinop ke tep gañ, agil, mib goñ cin ke tep gañ, agil, ag nipim ak me, ag nipim rek ma gip.

⁴Nibi bi si dep bin rek midebim! Niñim! Bin bi gos kiri tap lim dai ar wagin aul pis ken nep amib okok, God nop milik yapek, tap nib okok nep gos nipal. Nib ak, nibi tap lim dai ar wagin aul mideb tap okok midmagil linigabim ak, nibi God kausal maual ne midenigabim. ⁵Ar nibak God Minim ñu kil tikil aglak, “God Kaun cinop nab adañ li ñib ak, cin tap lim dai ar wagin aul mideb tap okok midmagil ma linigabin, agil, gos niñlig gi mideb,” aglak. Pen God Minim dai nibak nipek, tap yokop rek lip ar? ⁶Pen ne cinop yimig niñil, di tep gil, kod mid tep yib gip. Ar nibak nep, God Minim ak ñu kil tikil aglak,

“Bin bi ke nep midil, mid tep gipin, apal okok,

God kirop minim kilis rek agip;

pen bin bi yib kiri ke agel ar ma amnigab okok,

ne yimig niñil, di tep gil, kod mid tep gip,” aglak.

⁷Nib ak, God nop pis ken midil, ne ageb rek nep ginimib. Seten nop mer agem, ne nibep kirig gil siskol dil amnigab. ⁸God nop cig tep gem, ne nibep cig tep ginigab. Nibi tap si tap timel gipim bin bi okok, bin bi tep midon, agil, ñinmagil nibi gac gip ak ñig li yok tep ginimib. Pen nibi God nop kisen gipin, agil, esek apim okok, gos omal nipim ak kirig gil, gos tep nokim nep niñil, God nop nep cig tep gilig gi midenimib. ⁹Sik kirkir apim ak kirig gil, cib gek niñlig gi sil aglig gi midenimib. ¹⁰Bi Kib niñ mideb rek, cin bin bi yib ma mideb, agil, nop sobok genigabim ak me, ne yib nibep gek ar alañ amnigab.

¹¹Ai mam sikop. Ai mam ognap, kiri tari ginig nig gipal, agil, kirop ag dam ma yoknimib. Bin bi ai mam ag dam yokpal okok, God lo minim

ne ak abe ag dam yokpal. Nig genigabim ak, bin bi God lo minim sain gipal rek ma midenigabim; bin bi God lo minim tep mideb aka tari rek mideb, ag gos niñil nonim li tig bilok nipal bin bi okok rek midenigabim. ¹²Pen God ne nep lo minim ag lak. Ne nep lo minim niñil, bin bi minim kib niñnigab. Ne nep cinop di komiñ yokniñgab aka ñag pak linigab. Nib ak, nibi tari ginig, “Bin bi okok bin bi tep, bin bi okok bin bi timel,” agil agebim? Nibi nig ma ginimib.

Yib nibi ke agem ar ma amnimiñ

¹³Pen niñim! Nibi ognap apim, miñi aka tol rek, taun kib alap amil, nib okok mi nokim alap wög bisnis gil, mani kib dil, adik gi owin, apim. Pen niñ tep ginimib. ¹⁴Kisen tari tari ginigab ak niñil ma apim. Miñi komiñ midobin ak pen komiñ midobin nibak, seb di yipil yokip rek nep gip. Won ak midil, won ak kapkap kir kir gek amib. ¹⁵Gip nibak rek, minim apim nibak kirig gil agnimib, “Bi Kib nop tep genigab ak, cin komiñ midil nib nib ginigabin,” agnimib. ¹⁶Pen bin gep bi gep midobin, agil, yib nibi ke gem ar ameb ak, timel yib gip.

¹⁷Ar akniñ rek gep ak tep, ag gos nipin ak pen nig ma ginigabin ak, tap si tap timel ginigabin.

Bin bi tap koñai mideb okok

5 ¹Nibi bin bi gep yib okok, minim agniñ gebin aul niñim! Miker kib diniñ gebim rek, cib gek sil aglig gi midenimib. ²Agon kilnok kibap mani tap tep nibi koñai midoligip okok bir ajil gi ki gi yowip. Walij tep koñai nep nibi midoligip okok, kisoï sikol sikol ñib ñib miñan miñan juip. ³Gol silpa nibi ki gi yowip ak, nibi tap si tap timel gipim ak niñ tep ginimib. Mib goñ nibi abe mab milañ rek yinil sib rik yonigab. Ñin kisen ak ulep azeb won aul, nibi agon kilnok kibap mani tap okok koñai nep di okok we gipim. ⁴Niñim! Bin bi wög dai kiri gipal okok, kirop pe ma ñibek, kiri koslam midil sil agel, Bi Kib kilis ke yib ak niñip. ⁵Nibi lim dai ar wagin aul midil, wög wari ma gil yokop midil, miñ miñ yib gi ajpim. Nib ak, kaj okok mik tep gil, aneñ gek pak ñibal rek midebim ak, won par ma midenigabim. ⁶Bin bi tep, nibep tap timel alap ma gipal okok, kirop esek agil ñag pak lipim.

Miker ap onimiñ, cin yirik marik gil yo ma niñil, Bi Kib onigab, agil, nop kod midon

⁷Nib ak, ai mam sikop. Miker alap aponimiñ, cin yirik marik gil yo ma niñin; Bi Kib onigab, agil, nop kod midon. Bin bi tap wög gi yimil kod midel niñlig gi, miñab pakek, yiñ marip ap ranil magil tep pilniñgab. Nibi ak rek nep Bi Kib nop kod midenimib. ⁸Bi Kib onigab ñin ak yokop ulep mideb, agil, gos sek kod midenimib.

⁹Pen ai mam sikop. Ai mam ognap kirop ma ag junimib. Nibi ai mam ag juenigabim ak, Bi Kib nibep pen minim kib agnigab. Bi minim kib agnigab ak ulep sijak mideb; ulep won ak nep onigab. ¹⁰Ai mam sikop. Bi God minim agep birarik nep mideligipal okok, Bi Kib minim ne agel, kirop gi timel gel niŋlig gi, koslam yib mideligipal ak pen kiri yirik marik gil yo ma niŋlak. Kiri kapkap mid tep gilak. Nibi ak rek nep ar nibak nep ginimib. ¹¹Nibi nipim, bin bi gi tep gil, yirik marik gil yo ma niŋlak okok, kiri miñi miñ miñ gilig gi mid tep gipal, apin. Bi nak Job birarik nep midoligip, kesim ak nipim. Nop miker kib apek, koslam midek ñin ak, Bi Kib nop gos niŋlig gi midil mid dam amek niŋlig gi, Bi Kib Job nop gi tep gek, kisen mid tep gak. Tari ginig: Bi Kib ne per per bin bi yimig yib niŋil, di tep yib gip.

¹²Pen ai mam sikop. Tap kib yib ak, God yib ne ak yokop ma agnimib. “God niŋ mideb rek, niŋid agobin,” agil, ma agnimib. “Seb kab ar alaŋ mideb rek, niŋid agobin,” agil, ma agnimib. “Lim wagin aul mideb rek, niŋid agobin,” agil, ma agnimib. “Tap okok tap ognap mideb rek, niŋid agobin,” agil, ma agnimib. Yau, agnigabim ak, “Yau” nep, agnimib. Mer, agnigabim ak, “Mer” nep agnimib. Mer ak, minim kib dinigabim.

Sobok ginimib

¹³Nibep bin bi ognap miker gonimiŋ, nibi Bi Kib nop sobok ginimib. Nibi bin bi ognap miñ miñ ginimib ak, kimep ognap agil, Bi Kib yib ne agem ar amnaŋ. ¹⁴Nibep bin bi ognap tap gonimiŋ, Kraiss bin bi ne okok kod midebal bi kib okok agem apil, sobok gil, Bi Kib yib agil, wel ognap li ñinimel. ¹⁵Pen Bi Kib nop niŋ dil sobok genigal ak, Bi Kib ne gek, tap ginigab nibak komiŋ linigab; tap si tap timel gipal ak, Bi Kib ne niŋil kiriŋ ginigab.

¹⁶Nib ak, tap si tap timel gipim ak, pen pen ag yikil, nak ke abe, ai mam okok abe, Bi Kib nop sobok gem, ne gek nibep komiŋ linimiŋ. Bin bi Bi Kib ageb rek gipal okok, nop sobok gel, Bi Kib ne kilis ne gil, ke yib ginigab. ¹⁷Bi God minim agep Ilaija, bi yokop cin rek ak pen miñab ma paknimiŋ, agil, God nop kilis gil ag niŋek, mi omal nokim takin akniŋ kagol oŋid miñab ma pakak. ¹⁸Kisen pen ne kauyaŋ God nop ag niŋek, seb kab ar alaŋ nib miñab pakek, lim dai ar wagin aul tap okok tan ap ranil, tap magil pilak.

¹⁹⁻²⁰Ai mam sikop. Bin bi nibi ognap Kraiss minim niŋid ak kiriŋ genimel, kirop ag ñi tep gem, kauyaŋ Kraiss nop niŋ denigal ak tep. Niŋ gem me, tap si tap timel tari tari gipal okok, God niŋil kiriŋ gek, kisen kimil pis nep ma kimnigal.